



**Komunikadu Imprensa**  
**18 Setembru 2020**  
**Parlamentu Nasionál**

**JSMP apresia ho planu Prezidente Parlamentu Nasionál nian  
“Harii edifísiu PN, hadi’a kualidade fiskalizaun no kria Komisaun Especializada  
Permanente ba Sidadania”**

Iha 15 Setembru 2020, liuhusi diskursu Prezidente PN, Dr. Aniceto L. Guterres Lopes, iha abertura sesaun lejizlativa Datoluk nian iha uma fukun PN haktuir katak iha nia mandatu sei tau prioridade liu ba planu harii edifísiu PN iha tinan 2021, hametin koordinasaun no konsentrasaun sira kona-ba ajenda lejizlativa hodi bele aseguara kualidade produsaun lei sira.

Alende ne’e, sei hadi’a kualidade fiskalizaun deputadu sira-nian hodi orienta ba komunikasaun regulár entre deputadu sira ho membru Governu relasiona ho asuntu sira ne’ebé deskobre iha serbisu fiskalizaun deputadu sira-nian liuhosi serbisu iha komisaun especializada sira.

Iha parte seluk atu hadi’a partisipasaun públiku hodi bele asesu ba atividade parlamentu nian, Prezidente PN mós propoin iha planu atu kria Komisaun Especializada Permanente Sidadania nian hodi halo debate, audénsia no halo esklaresimentu ba asuntu interesante sira entre sidadaun, deputadu no membru Governu sira iha PN.

“JSMP konsidera planu ne’ebé Prezidente Parlamentu hato’o importante no relevante tebes ba serbisu Parlamentu nian. Asuntu sira hanesaun harii edifísiu ne’ebé própriu no adekuaudu ba PN no promove partisipasaun públiku nian iha setór lejizlativu nu’udar asuntu importante sira ne’ebé tinan barak JSMP rekomenda atu hadi’a hodi hasa’e kualidade no produtividade Parlamentu Nasionál nian hanesan JSMP sita ona iha relatóriu JSMP nian.<sup>1</sup> JSMP espera katak deklarasaun sira ne’e bele sai hanesan komitmentu polítiku Prezidente PN atu bele realiza,” dehan Diretora Ezekutiva JSMP, Ana Paula Marçal.

---

<sup>1</sup> Bele haree iha pagina 12 website JSMP: [https://jsmp.tl/wp-content/uploads/RelatoriuPWP\\_TETUM.pdf](https://jsmp.tl/wp-content/uploads/RelatoriuPWP_TETUM.pdf)

Aleinde ne'e, Presidente Repúblika, Francisco Guterres "Lu-Olo" iha nia diskursu hafoin halo esklaresimentu kona-bá polémika kona-ba konstitusionalidade no legalidade VIII Governu Konstitiuonál nian tanba orsamentu Estadu la pasa liga ho Artigu 112 pontu 2 nia intrepresaun ho mós dezafiu ne'ebé nasaun hasoru iha tinan 2019/2020 ligadu ho dezastre naturais no pandemia COVID-19.

Parte seluk Presidente Repúblika mós husu deputadu sira atu debate ho kóritiku, nakloke, onestu nu'udar meu ida ne'ebé konstrutivu ba hametin páz, unidade nasional no integridade no bele refleta atu hatan ba nesesidade no interese povu nian.

JSMP mós nota katak iha sesaun lezislativa daruak nian, maski Parlamentu Nasionál la dun iha estabilidade polítika ne'ebé di'ak, maibé konsege prodús lei sira hamutuk 8<sup>2</sup> no rezolusaun sira hamutuk 16<sup>3</sup>. Lei importante loos ne'ebé Parlamentu Nasionál prodús iha momentu ne'ebá mak Lei Nú. 7/2020 kona-ba medida prevensaun no kombat korrupsaun. Ida ne'e hatudu progresu ida ba públiku katak Parlamentu Nasionál mezmuke hasoru problema no dezafiu maibé funsiona ho normál durante período impase polítika.

JSMP nafatin rekomenda ba PN atu bele estabese Programa Lezislasaun Nasionál atu bele fasilita PN hodi identifika no planeia ho di'ak lei importante no relevante sira ne'ebé presiza prodús iha kada sesaun lejislativa durante lejislatura ida. Ida ne'e nu'udar meu ida ne'ebé bele ajuda hasa'e produtividade deputadu sira nian no bele sai hanesan matadalan ida ba PN hodi hala'o nia serbisu ho efisiente no efetivu liutan.

Ikus liu, JSMP husu mós ba PN atu evita diskusaun no prátika polítika insulta malu no rasizmu ne'ebé deznesesáriu no mós diskusaun sira ne'ebé orientadu liu ba interese polítika partidáriu no kontra-produtivo ka vingansa polítika sira ne'ebé prejudika interese nasional.

Atu hetan informasaun liutan favor kontaktu:

Ana Paula Marçal  
Diretora Ezekutiva JSMP  
Telefone: (+670) 77040735  
Diresaun e-mail: [ana@jsmp.tl](mailto:ana@jsmp.tl)  
Website: <http://jsmp.tl>

---

<sup>2</sup> Bele haree iha website jornal da repúblika MoJ: <http://www.mj.gov.tl/jornal/?q=node/12>

<sup>3</sup> Bele haree iha website jornal da repúblika MoJ: <http://www.mj.gov.tl/jornal/?q=node/19>